



YELOD 28id NÜM: 04 PRILUL 2018 PADS: 25 – 32

O Volapükaflenes valöpo!

In gased mázula vödem fa ‚Otto Jespersen‘ dö mekavapüks pepübon. Tefü atos läxcıfal: Brian R. Bishop ägespikom sökölösi:

Baicedob ko ‚Otto Jespersen‘, das mutoy tradutön tikamagoti, no vödis, ab atos tefon pükis valasotik. Distü om ye cedob plako, das sio kanoy gebön pükis mekavik: ‚Esperanto‘ u Volapük < ed i püki natik ä mödatumyeliki: latin ad malön senis valasotik. Pük veratik fågon ad notodön e sevi e seni.

Memob, das bü degyels mödik äkomob pö kobikam mödinetik alyelik di ‚Esperanto‘, kel äjenon in zif: ‚London‘. Us ädabinons feits bolitiks hetik e fäkädälik bevä komans de Lofüda- e Vesüda-Yurop. Nutimo labob flenis mödik di ‚Esperanto‘ in läns mödik, e veratiko äflenikobs no tikaviko, ab suemäliko.

E memob, das, ven äkolkömob eli Ralph Midgley bü degyels ed äspikobs Volapüko, äprimobs ad senön lanäli tefü pük, muf e kolköm obsiks.

Suvo in yels pasetik äkomob pö kolköms, kö äspikobs latino. Äsmilobs, äflenikobs, äluspiokobs, äblöfädobs e.r. dü fidäds, plets, vob, tävs e.r.

Sevoy-la, das dabinons lelöfs ed igo mats e cils dub püks: ‚Esperanto‘ e latin. Sevob famülis, kö spikoy pükis at lomo. Dö Volapük perevidöl somikosi no sevob, ab fümob (no sevob), das ädabinons mats Volapükik timü ‚Schleyer‘.

Kludo, no kanoy bedotön, das plakiko sens valasotik dabinons in pük, va mekavik va vönik u foginänik. Pük fäkükon breini e, suno poso, ladäli, pato pösodiko, ab igo peniko.

Lesuvo, du studob penädi, lonülob obe säki: „Kis binon-li koded e desin lautana?“, votavödo ma notodot Linglänapükik: „Kiöpao kömom-li?“, dat kanob suemön tikamodi omik. Dub buk: ‚An International Language‘ el Otto Jespersen ädesinom ad komandön eli ‚Novial‘.

As sam: su pad balid* saitom spikedi ela Schleyer: „Menade bal, püki bal“. Nen-doto, äsä penom ‚Jespersen‘, spiked at kanon sinifön püki bal löpü püks valik, kel otefon pükis votik, patiko smalikis, ab i kanon sinifön püki bal bevü pükans pükas valik. Atos, cedü ob, binon blig püka bevünetik: yufa-, telid-, donapük. Atos i binon desin Deutänana: ‚Uwe Moritz‘, ko kel äspodob bü yels mödik, e gaseda omik: ‚Etnismo‘ (logolsös eli: https://eo.wikipedia.org/wiki/Uwe-Joachim_Moritz).

Atosi, cedü ob, el Jespersen penom tefü blig püka okik: ‚Novial‘.

E veratos-li üfo, das els „ü“ ed „ö“ in Volapük binons tu fikuliks (pad: 5)*?

Noet fa redakan: Ekö! kiöpao kömom-li el Brian? ☺

IV:26:2018

El Jespersen no vipom ad komandön latini pla ‚Novial‘. Demü atos tuükom fikulis – kels sekons de tidam võnaoloveik. Do fümiko dabinons jäfūdisevans, kels ni kanons ni vilons gebön püki okik: latin, sevob das dabinons jäfūdisevans mödik, kels kanons e vilons spikön e penön püki okik. To pad folid* buka, kanoy spikotön nutimo in latin dō telefonöms [‚telephona‘] (igo pokatelefonöms [‚telephona gestabilia‘]), toods [‚autoraedae‘] e radionöms [‚radiophona‘], ed igo spodön dō ons medü bevüresod [‚interrete‘] in pads lemödik.

Taspikom oke, ven siom, das spikans pükas bevünetik se läns difik kanons suemön odis (pads: 6-7)*. Das dabinons poedots e dramats vemo senäliks in mekavapüks (e latin), jonon, das atos ga sio mögon, e das binons so gudiks äsä in pük netik.

Dō difikam pükas at pos tim (pads: 7-8)*, sevobs, das latin nutimik labon vödemi e gramati leigikis, äsä timü Cicero (kel äninükom nulavödis, a.s. tefü vabs), e pük: ‚Esperanto‘ no votikon. Kod atosa binon, das pagebons fa mens netas difik spikoto e peniko. Näi püks romenik, i latin jünü laidulon.

Brian R. Bishop

* *Padanüms tefons dokümi: ‚Otto Jespersen An International Language part 1.pdf‘, kel dabinon in nünedadiläds Volapükagrupas di ‚Facebook‘ e ‚Yahoo Groups‘.*

Baol (fin).

fa ‚Akutagawa Ryūnosuke‘, tradutod fa kadāman ‚Zhang Yutong‘.

Diläd: II.

Äbinos fluküp yela: 1918. Jiel ‚Akiko‘ ettimik, dū täv lū vilad okik in ‚Kamakura‘, äkolkömoſ fädo in tren lautani yunik, keli ikolkömoſ seimna. Äpladom sui päkema-boed floredi krūsena, keli ögivom flene semik in ‚Kamakura‘. Täno, ‚Akiko‘ ettimik – läd: ‚H—‘ nuik – äsagof, das semikna, ven älogof krūsenis, ämemikof paseti. E täno äspikof veitöfiko dō baol in ‚Rokumei-kan‘ lū om. Lilölo memoti läda fa of it pakonöli, lautani yunik vemo änitedikom.

Ven ifinükof spiki, man yunik näio äsäkom läde: ‚H—‘: „Sevor-li nemi marena-fizira Fransänik at?”

Läd: ‚H—‘ ägeof stuniko: „Fümö! Pänemom ‚Julien Viaud‘⁸.”

„Kludo äbinom hiel ‚Loti‘! Äbinom ‚Pierre Loti‘, kel älautom eli ‚Madame Chrysanthème‘!”



Man yunik äbinon fredik ä stäatik. Läd: ‚H—‘ ye älülogof stuno logodi mana, ed ai dōnu ävispof: „Nö! No pänemom ‚Loti‘. Pänemom ‚Julien Viaud‘.” ■

Ün dekul yela: 1919.

8 ‚Julien Viaud‘ ü ‚Pierre Loti‘: lautani Fransänik, kel ettimo ävisitom Yapāni, ägolom lū baol in ‚Rokumei-kan‘ päjenüköl. Posä igetävom lū Fransän, älautom konedi: ‚Madame Chrysanthème‘ (Läd: Krūsen) ma tävafätots okik in Yapān.

Hiel ‚Akutagawa‘ älautom konedi at i bai ‚Loti‘ e koned omik.

Bela kuprinik Jisiör (3).

Galedan nog spikom:

„Flifädikolös bosilo is! Baldelavobod ut, keli oflagoy ole, obinon mö malagit rafinik somödiko...” Ed elonülo me bligädi vero nedunoviki.

No daloy tadunön. Posä galedan idegolom, el Stepan äprimom ad svönön me lecopil, zuo ga äbinom hilepul daskilik. Kūpom: kio gudos! Malagit doniofalon, äsva ek dojedon-la oni me nams. Zuo vat emoflumon seimöpio se meinavoböp. Esägikos.

„Ekö!” tikom, „ga binos gudik. Bo Jisiör ememikof obi.”

Pas etikom so, sunädo edastralos. Loegom stanön Jisiöri is, fo om.

„Binol stimaban”, spikof, „o ‚Stepan Petrovich’! Kanoy stimön oli. No ebedredol kapari mismelik. Süpero esagol osi ome. Ogolobsös bo ad vestigön matablimoti obik. Ob it i fölob promi obik.”

Ye evedof saäbälik, äsvo atos no pliton ofi. Äflapof palmis okik ta od, lasäriis älürönons, äsäjänädons eli Stepan, e Jisiör ägiovof ones büdi:

„Odebreikolsöd is baldelavobodi ön mödot telik! E malagit obinonöd pulevälöl, efe sota sadinöfik!” Poso spikof ele Stepan: „Benö! o higamil! golobsöd ad vestigön matablimoti obik!”

Kluo golons. Befoof, el Stepan golom pödü of. Kanof golön alseimöpio, e valikos binon lügolovik pro of. Äsvo cems gretik dis tal edavedons, e völs onas binons distöfiks. Valiks u binons grüniks, u yeloviks ko püns goldakölik. I su ömiks flors kuprinik dabinons. I dabinons dofablöviks, lasürablöviks. Me vöds nemödik sagölo: binos so vielik, das töbo ek okanon-la bepenön atosi. E klotem len of, efe Jisiör, cenon. Nü lunidon äs glät, tän süpo vedon nenkölik, e nü lunidon me breküls diamoinik, tän vedon kuprinaredik, poso dönu lunidon äsä me sadin grünik.

Golons, golons, ed estopof.

„Fagikumo”, sagof, „mö liöls mödik binons stoins yelovik e gediks. Pro kis sötobs-li dalogön-li onis? Ed is stanobs ebo dis el Krasnogorka. Is pö ob pläamü eleds Gumjoshki top jerabikün binon.”

El Stepan logom cemi vemo gretiki, ed in on bedis, tabis, lustulilis – val binü kuprin rafinikün. Völs binons malagitiks ko diamoins, e nufed binon dofaredik ko bläg bosik, zuo len on flors kuprinik binons.

„Seadobsös”, sagof, „is, spikobsös!”

Posä eseidons okis sui lustulils, jimalagitan säkof:

„Elogol-li matablimoti obik?” — „Elogob osi”, el Stepan sagom.

„Benö! lio nu tikol-li dö mat?”

El Stepan ga no sevom, vio mutom gesagön. Älabom – ga lilölöd! – jigami. Äbinof lädül gudik: jinenpalan. Dido no äkanof-la leigön leigodü jimalagitan demü jön! Men komunik, kösömik. El Stepan äzogom, äzogom ed espikom:

„Matablimot ola pötöfonöv pro zars, ye binob man voböl, komunik.”

„Ol”, sagof, „o flen löfik! no geyilölöd! Sagölöd stedöfiko, va omatikel ko ob u no!” Ed of it evedof mu vemo saäbälik.

Benö! el Stepan egespikom stedöfiko:

„No dalob, bi ematirajanob ko jivotikan.”

Äsagom so ed ätikom: onu ozunikof. Ye ejinof fredikön.

„Binol stimaban”, spikof, „o ‚Stepanushko’! Elobob oli demü cif, e demü atos olobob oli vemikumo mö naeds tel. Labods obik no ekoedons oli vedön labiäliki, no ecänol eli Nasten'ka olik tä jilepul stonik.” Dido jigam hilepula pänemof el Nastja. „Ekö!” sagof, „legivotil ole pro jigam olik”, e givof kasäti malagitik gretik. Us – ga dalilölöd! – vomideks valasotik binons. Sevabo lilalins, doatalins, e ret, kelos no igo jigam liegik alik labof.

„Ga lio”, hilepul säkom, „de top at olöpiokömob-li?”

„No kudölöd tefü atos! Val poduinon ole, ed olibiostadükob oli de cif, ed olifol liegiko ko jimatan yunik olik, ab labob pro ol sagodi veütik, sevabo: leno omemikölöl poso obi! Atos obinon bluf kilid obik pro ol. E nu fidölös bosilo!”

Dönu äflapof palmis okik ta od, lasärils älürönons, äbepladons tabi löliko. Ädaifidof ome brasidasupi legudik, fitakeki, hijipamiti, büli e reti, kel paflagon ma kösöm Rusänik. E latikumo spikof:

„Benö! adyö! o ‚Stepan Petrovich’! dalilölöd küpälo! no omemikölöd obi!” Pö of it ga drens esüikons. Leigüpo edispladof nami, e drens – tofö! tofö! – solidikons fomü grens. Ekö! binos ya namet lölik. „Ekö! sumölöd as prim liega! Givoy moni mödik tä stonils at. Ovedol liegik”, e givof onis ome.

Stonils binons koldiks, ab nam – ga dalilölöd! – binon hitik, äsva binon lifik, e bosilo dremon.

El Stepan elüsumom stonilis, vemo ebiegom, ed esäkom:

„Kiöpio mutob-li golön?” Om it id äglumikom. Äjonof lüodi me doat, sunädo golöp ämaifikon fo om, äs sop, zuo äbinos litik in on, äsä delo. El Stepan ägom da sop at, dönu älogom glunadivis valasotik ed äkömom ebo lü meinavoböp okik. Älükömom, sop sunädo äfärmikon, ed ävedos, äsä ibinos büo. Lasäril älürönon, älenyümon jänädi len lög oma, e kasät ko legivots süpo äsmalikon, sodas el Stepan äklänedom oni jelü klotem lä blöt oka. Pos brefüp galedan meinädik älükömom. Ispetom ad smilön, ab äloegom pö el Stepan pekobükön malagiti mö mödot plu ka bligäd, zuo pilevälöli efe klada löpikün. „Kis”, tikom, „atos binon-li? Se kis atos edavedon-li?”

Enüdranom ini meinavoböp, edalogom vali ed esagom:

„Pö meinavoböp somik alan debreikonöv somödiko, äsä evilonöv.” Ed ädugom eli Stepan lü meinavoböp votik, otüpo ägivom hinefi okik voböpi at.

Ün del sököl el Stepan äprimom ad vobön, ed ekö! malagit bundaniko ädefalon, zuo regils sa voulots äprimons ad komädön. E pö etan, efe hinef, – o bisar kion! – nos gudik binon, te stoins nenvöladi e dobanoboin pubons. Süpo galedan äreaform ad suemön vali.

Ärönom lü cif. Äkonom: so e so.

LÖF MEDÜ SPIKETS (FIN)

Süfül velid (föivot)

Isaías (*nekredäliko*): No kredob osi! Ven limun binon gretik, lubegan miniludon.

Inês: Ab lonülob ole i stipi obik.

Isaías: Kiniki-li?

Inês: If oplöpol dü düp lafik ad bleibön no ...

Isaías: No maleditön-li?

Inês: Nö! No sagön spiket! If oplöpol pö atos, nam obik obinon olik.

Isaías: Vo-li?

Inês (*seidölo oki*): Veratö!

Isaías: Ab dalob bleibön seilön, vo-li?

Inês: Liö! lenö! Mutol spikön nenropo!

Isaías: Atos binon boso fikulik: kösöm pöpik labon völad! lonema.

Inês: Ag! eskeipol bali!

Isaías: Kisi vilol-li? Kösöm binon...

Inês: Natäl telid. Ya naed telid.

Isaías: Pö naed kilid riskäd dabinon.

Inês: Ag! ag! ag! Dinäd at omiplöpon.

Isaías: Ab no nog eprimobs. Ats pesagons desino. Primobsös! Binob in lemödot bluva, in ditreta lemödot!

Inês: Nog bal!

Isaías: Protestob! El „binob in lemödot bluva” no binon spiket. Lü söl alik binonöd stim omik.

Inês: Sio operädol... Küpälolöd: binos düp telid (*jonof gloki*). Dasumol-li yüli? (*Paud.*) Benö! Seil binon baiced.

Isaías: Ha! nu binos ol, kel sagol onis! Magiv egekömon lü magivan.

Inês: Ag! ag!

Isaías: Atos äbinon pöl.

Inês: Danädü pöls notarans kosidons. (*Paud.*) Benö! sagolöd bosü...

Isaías: Kisi osagob-li?... te... das löfob vemo oli... e...

Inês: Üfo sagolöd: lunüpo kupon luflad jüs fino däbrekon.

Isaías: No stigedolöd obi, o läd! No stigedolöd obi!

Inês: Alan lütiron vati lü mül okik.

Isaías (*mufülölo oki*): Vat! Müll! O! tom kion!

Inês: Kis ejenon-li ole, o söl?

Isaías: Nos... labob nosi... binos proib ut, kel töbon obi... kösöm et maleditik... jinos lü ob, das eperob täläkti...

Inês: Ovilol-li seivön nulodi?

IV:30:2018

Isaías: Sunädo oseivob oni.

Inês: Sagolöd utosi, kelosi ovilol! Maifükolöd ronäti spikedas e spiketas...
Spikolöd, spikolöd utosi, kelosi ovilol!

Isaías: E stip-li?

Inês: Enosikon. (*Givölo nami okik*). Ekö! binob olik.

Isaías (*kotenik*): Obik! (*Votavögädo*.) E votikans-li?

Inês: No dabinoms! Neai ädabinoms!

Isaías: Galob-li? If slípob, leadolöd laislipön obi; no galükolöd obi.

Inês: Galol löliko.

Isaías: Vo-li? (*Löbunölo dub blesir*.) Klu, God lifomös! Lifonös blesir!... ,la la la!... (*vilom bradön ofi*).

Inês (*vitölo omi*): Stopolöd! Löf vemikum e bold nevemikum!

Isaías: Slafan ko nam nämik... (*Votavögädo*.) Daloy-li sagön spiketili at?

Inês: Somödo äsä vilol!

Isaías (*finüükölo*):... binon tirenan nämikün. (*Gleipomölo nämis ofik*) Ed ol-li?
Löfol-li obi, o silanan obik?

Inês: Takedikolöd: löf okömon poso. Binolöd himatan gudik e leadolöd
progedön dini.

Isaías: Rajanö! No dü del bal ädaglofon el ,Karthago’.

Inês: Ed ai konfidolöd vemiko spiketis olik.

Isaías: Binos veratik! Din ojenöl binon din nämöfik. Men mobom... e
dagebof vom.

Inês: Saidö! Bejäfolöd dokümis matikama.

Isaías: Ifi laboy mudi, no mutoy ... kanitön. Ab... (*lü lüloganef*)

Isaías:

Pled peduinon,
ab bü mogolam obas
sunädo pulilon de Inês
desir se ladäl obas.

Inês:

Fredadramat efinikon,
breins mödik ävobons,
plodi olsik begobs
pro „Löf medü spikets”.
(*Körten donikon*.)



KOLUN

fa ‚Frank Roger‘, ini Volapük petradutöl fa ‚Hermann. Philipps‘.

1 In zänöp ela ‚European Space Agency‘ (‚ESA‘) zelay me jampänavin bundanik nuni lanälüköl dö desinod jünü vemikün ganeta ot.

In televidaspikot nemediko pabroadöl calospikan ganeta sagom: „El *Ulysses* elänon sefiko su munasürfat, e ya eprimon ad broadön. Beletäv no peskipöl balid Yuropik lü mun eplöpon. Klu klülos, das i Yurop kompenon pö vestig levala. Kludo nämäd mätedafägik nu dabinon näi Lamerikänans, Rusänans, Tsyinänans e Lindänans. Pro ganet obsik atos fe binon te prim levalaseivida-desinoda sublimik. Mens anik ya klienons-la ad drimälön dö beletäv peskipöl, ab atimo mutobs bu val bejäfön preseni e frutidön bundani nünas, kelis el *Ulysses* obroadon.”

Nos pasagon dö sākāds kaenik primü desinod, efe pōkanuneds, nuns dö neplōps kaenik, būosagods dö desinod lölik ömiplöpöl. Nu in gased veütik reidoy: „If fin gudos, val gudos”, do desinod ebo te eprimon, plas finon.

2 El *Ulysses* elänon lä top pädesinöl; sitots kaenik valik jäfidons nomiko, e nüns pabroadons lü tal. Atos tefon nunis gudik.

Nefüm semik ye dabinon tefü sākāds, kels ekomādons ebo pos jütükam veigaraketa. Nü sagoy obes, das no kanoy u viloy jonön publüge nulälik magodis balid fa vestigöm munik, sagāds ömsotik papakons. Calospikan ganeta noom seimikis sākādis fefik, e promom, das magods pojonons, „sosus dināds anik pufidunons”. No kanom plānön kuratikumo dinādis ot.

In medāds niluds ömsotik bundanons dö utos, kelos jenon-la su mun.

3 Magods – bainuniko fa el *Ulysses* pemeköls – päpladons klāno fa bal cälābans ela ‚European Space Agency‘.

Ots äbinons badakalietiks e jinons magön malis jäfa. No mögos ad fūmetön, va binons legiks, peretutöls, u dido pedobüköls.

Pos düps anik, penets dö atos bundanons in medāds sogik, e poso ün del ot el ESA pūbon nuni calöfik:

„Filmūlamagods fa el *Ulysses* pebroadöls magons dinis nenomöfik, kels yūmetons ko sākāds kaenik ebo pos prim desinoda. Anu vestigobs natāli sākādas at, ed ogebādobs mesūlis lönedik.”

Ma sagāds se fonāts nesevädik klānatāvans eboidons okis ini el *Ulysses*. Atosi calospikan fūmädiko noom: „Sagāds at binons nesiām dastuniälik. Jelamesūls tō levalapof: ‚Kourou‘ vemo sevārōns. Zuo pro klānatāvans plad saidik no dabinon boidü munavestigöm u raketasitot. Ūf neluverätiko men u nim seimik dido äketāvonöv, veriko dead isekonöv. Jafāb liföl lenonik ilovelifādonöv vifikumami, loxinadeſi e vamotis vemo lās ser.”

4 Magods nog mödikums penotükons klāno. Nendoto jonons magedis menik, kels mufons. Sekū kod at el ESA noganūkon gasedemakonferi, e lespetoy nūnis nitedik. Calospikan, kel nunom dinādi at, klūlo binom bluvik:

IV:32:2018

„Nu kanobs fümükön, das bü deflitam ela *Ulysses* pösods negitodik anik eplöpons ad nūdranön noe ini ziläk peproiböl abi ini vestigöm munik it. Nolavans e jäfüdisevans valik kazetiko fümükons nemögi ad lovelivön tävi de tal lū mun nen medöms lönedik. Too pösods at bo eplöpons tefū atos. Sevobs nosi dö dientifs, motivs e methods onas. Nunis zuik oloseidobs, sosus vestigs obsik ukleilükons dinādi klänöfik at. Fino fredob ad kanön nunön, das sākād at no jinon tupön dunodis nomik ela *Ulysses*. Munavestigöm laibroadon nūnis, ed eprimon ad duinön programi tefū glunivestig.”

Medāds memükons steifūlis būik fuganas lukünik, kels iklānedons okis in lānamasitot flitōma e milagiko ālovelifādons lutatāvi somik. Alan ye sevon, das flitatāv e tāv da vag levala mu vemo distons.

5 El ‚BBC‘ broadon spikoti ko hi-Somalānan. Vilom blebön nennemik, e legasom, das binom blod bala klānatāvanas, kels āflitons lū mun in el *Ulysses*.

„Blod obik e jimatan oka ipreparons tävi at mu kälöfiko. No fādo ārivons lifōlo zeilōpi oksik. Iskilükons okis in koldülükama-lucems e dis vat ad kösömükön okis ad vamots läs ser e loxinadef. Āmekons klotemis vami dakipōlis de siolastōf pevāledöl, e mekavastōfasākādis plujūdik pro loxinastok. Id āsmugons boidio nulūdotis e vati sa dinis votik frutik. Fredob vemo, das blod obik āfāgom ad stunükön levemo nolavanefi lölik dub fümäl, fümād e sufid oka.”

Fövot ofovon in gased mayula.

Vöds nekösömik anik in konotil löpik pegeböls (Lingl., Deut.):

‚BBC‘ - ‚British Broadcasting Corporation‘;

beletāv - expedition, Forschungsreise;

cālāb - staff member, Mitarbeiter;

calospikan - spokesman (-person),

Sprecher;

dastuniälük - sensationalist, sensations-lüstern;

deflitam - departure, Abflug;

desinod - enterprise, Unternehmung;

dunods - functions, Funktionen;

filmulamagods — video images, Video-bilder;

klānatāvan - stowaway, blinder Passagier;

lānamasitot - landing gear, Fahrwerk;

lānön - to land, landen;

ledesinod - large-scale project, Großprojekt;

medāds - media, die Medien;

medāds sogik - social media, soziale Medien;

mekavastōf - plastics, Kunststoff;

ganet - agency, Agentur;

nūns - data, Daten;

peskipöl - manned, bemannt;

pevāledöl - discarded, ausgemustert;

plujūdik - multi-layered, mehrschichtig;

pōkanuned - error message, Fehlermeldung;

(sākama~)spikot - interview, Interview;

spikot nemediko pebroadöl - live interview, direkt übertragenes Interview;

seividadesinod - mission, Erkundungsprojekt;


siolastōf - insulation material, Isoliermaterial;

Somalānan - Somalian (pösod), Somalier;

sūrfat - surface, Oberfläche;

veigaraket - transport rocket, Transportrakete;

vestigöm munik - lunar module, Mondmodul.



Mödikis pasatanögis jönik vipom valanes cifal e redakan:

Hermann Philipps